

www.BibleForChildren.org




Juan 14



Kasapasmi Jesús nirka: —Mana sungupi iapa irkiaspa kaichi. Imasami Taita Diusta suma iuiangichi: nukatapas chasallata suma iuiawaichi. Nukapa Taitapagpi achka kaugsadirumi tia. Mana chasa tiagpika, timpumi willaikichita.



Kunaura, paipagmami ringapa kani, kamkunamanda
kaugsadiruta allichigringapa. Chi kaugsadiruta ña
allichigrispaka, ikutimi samusa, kamkunata pusangapa;
chasaka, nuka maipi kaskapi, kamkunapas
kaugsagringapa.




Nuka Juan, kamkunawa waugkindimi kani.
Kamkunasina iapa llakiiwami kani. Kamkunawa,
Taita Dios suma mandakuskapimi

nukapas kagringapa kani.



Jesusmi nukanchita karamú, tukuipi paita
mana sambaiaspalla katiraiangapa. Diuspa
Rimaita i Jesús ima willaskata nuka

iachachikugmandami
Patmos suti



islapimi nuka
wichkaraiarkani.




Chasa niwagllapika, Santu Ispiritumi nukawa
tukugsamurka. Chasawaka, muskui ukupisinami
tukugsamurkani. Suma luarpi kawarkani, sug mandag
tiaridiru tiagta. Chi mandadirupika, sugmi tiakurka.




Sug luarpi, kai alpapi, alpa ukuma i lamar iakupi,
tukuipipas tukui ima tiaskakuna i tukui
kaugsagkunapas ima ninakuskatami
uiarkani. Taita Dius tiaridirupi
tiakugta i paipa Ubija sutitapas
kungurinakurka, kasa nispa: —Ari,
kam, imaurapas
iapa suma alli
atunmi kangi.



Kammi imaurapas kangi tukui pudig. Chasami kamta
ninakungapa kanchi, maituku waranga waranga
watakuna ialigpipas.



Sug atun suma puiblu, Taita Diuspalla kag musu
Jerusalén niraiaskatami kawarkani. Chi puibluka,
suma luarmanda, Taita Diuspagmandami
uraikumukurka. Imasami warmi tukungapa kag,
sumaglla allichiriska ka, kusawa sugllapi
tukungapa:
chasallatami
allichiriska
karka.



Mandag tiaridirunigmanda sinchi rimai uiariwarka,
kasa niwaspa: —Kawai. Kaika, Taita Dios runakunawa
kaugsadirumi chaiamurka. Paikunawami kaugsangapa
ka. Chi runakunaka, paipallami kangapa kankuna. Taita
Dios kikinmi paikunawa kangapa ka.



Chiuramandaka chi anjilka, suma kaugsai karadiru
atun iakutami kawachiwarka. Chi iakuka, sug
bidriusina punchami karka. Taita Dius i paipa
Ubijapa mandadirunigmandami chi
iaku llugsimukurka.



Indi ñi killa mana ministinchu, chi puibluta
punchaiachingapa. Taita Dius suma
kawakuskawami puncha ka. Paipa Ubijami
tukui chipi punchaiachig niraiá.



Maillallapas mapa niraiaskaka mana chipi iaikungapa kanchu. Jiru millaita ruragkuna, llullachispa kaugsagkuna, chikunapas mana iaikungapa pudingapa kankunachu. Runakuna kikinkunapa suti kaugsangapa willaraiaska librupi tiaskakunallami chima iaikungapa kankuna. Chi librutaka, Taita Diuspa Ubijami chariku.




Paikunapa tukui wikimi ñawimanda tustachingapa ka.
Mana mas tiangapa kanchu wañui, ñi wakai, ñi llakiiwa
kaparii ñi nanai. Tukui ima ñugpata
tiaskakuna ñami puchukarirka.




Ñi ima maldisiskaka mana chipi tiangapa kanchu.
Taita Dios i paipa Ubijapa mandadiruka, chi puiblupimi
kangapa ka. Paipa lutrinsinakunaka ningapami kankuna:
"Iapa allimi kangi". Paita ñawi ñawimi kawangapa
kankuna.

Paipa sutika,
printipimi
churaraiangapa
kankuna.




Atun i uchulla wañuskakuna, chi mandag tiaridirupa ñugpa ladu saianakugtami kawarkani. Chiuraka, sug librukunata paskarkakuna. Maikan suma luarpi kaugsagringapa willaraiaska librutapasmi paskarkakuna. Chi librukunapi imasa willaraiaskata kawaspami, allilla u mana allilla kaskata chi wañuskakunata justisiai rurai tukurkakuna.

Maikanpa suti kaugsangapa willaraiaska librupi mana taririgpika, paikunatapasma chi ukuma sitai tukungapa kankuna.



Santu Ispíritu i Taita Diospa Ubijapa warmika
ninakumi: —Samui. Maikan uiagka niichi: —Samui.
Maikan iakunaiai iukagkunaka, munaspaka samuichi,
diltudupa kaugsai karadiru iakuta mana
randispalla upiagsamungapa.



Taita Dius, kai
alpamanda tukui
runakunata ña iapa kuiaspa, kikinpa
suglla wambratami kachamurka;
chasaka, paimanda tukui suma
iuiagkuna, puchukaringataka,
mana puchukaridiru kaugsaita
iukangapakuna.



Romanos 3:23

Tukuikunami pandarinchi. Chimandaka, Taita Dios atun sumaiachiskamanda iapa karupisinami karkanchi.

Romanos 6:23

Pandari spa ruragka, wañuitami chaskí. Ikuti Taita Dioska, nukanchipa Iai Jesucristowa mana puchukaridiru suma kaugsaitami kará.

Hebreokunata 9:27

Imasami tukui runakunata chaiá, sug biajilla wañungapa; nispaka, Diospa ñawi ladu justisiai tukugringapa:



Efesopi 2:8,9

Taita Dios suma kuiagmandami, kamkuna, paiwa suma iuiaripa, kispichiska tukurkangichi. Mana kispirirkangichichu kam kikinkunapa iuiaillawa. Taita Dios kikin karaskallawmi kispichii tukurkangichi. Kam kikinkuna allilla ruraskamanda mana kispirirkangichichu; chasaka, ñi pipas mana atuniachiripa ningapa: "Nuka kikinllami kispirirkani".

Romanos 10:9,10

Kamkunapa simiwa willaspami iukangichi, Jesús nukanchipa iaia kagta ninga. Kamkunapa iuiaiwami iukangichi suma iuiaringa, pai wañuskata, Taita Dios kaugsachiska kagta. Chasa iuiaiwa kagmandami kispichii tukungapa kangichi. Kamkunapa iuiaiwa Jesucristowa suma iuiariskamandami mana pandarig niraiangichi. Simiwa Jesucristomanda willagmandami kispichiitukungapa kangichi.



Juan 3:16,17 Taita Dios, kai alpamanda tukui runakunata ña iapa kuiaspa, kikinpa suglla wambratami kachamurka; chasaka, paimanda tukui suma iuiagkuna, puchukaringataka, mana puchukaridiru kaugsaita iukangapakuna. Taita Dios, kikinpa wambrata kai alpama mana kachamurka, kaimanda runakunata justisiai rurangapa. Nukanchita kispichingapami paita kachamurka.

1 Juan 5:11-13 Kasami Taita Dios willá: mana puchukaridiru suma kaugsaitami nukanchita karamuska ka. Chi kaugsaita paipa wambrawami karamuska ka. Chiwa, maikanpas Taita Diospa wambrawa suglla iuiyai chariraiag, chi kaugsaitapasmi iuká. Ikuti maikanpas mana Taita Diospa wambrawa suglla iuiyai chariraiagpika, manima chi kaugsaita iukanchu. Nuka willaskata kachanakuikichitami, kamkuna kasa iachangapa: kamkuna Taita Diospa wambrawa suma iuiarigkuna, mana puchukaridiru suma kaugsaitami iukangichi.



Juan 14; 2 Korintopi 5; Apocalipsis 4, 21, 22

Storyline by: Edward D. Hughes

Illustrated by: Lazarus
and Alastair Paterson

Adapted by: Sarah S.

Inga Bible (inb) © 2009, Wycliffe Bible Translators,
Inc. All rights reserved.

<https://live.bible.is/bible/INBWBT/MAT/1>

©2024 Bible for Children, Inc.

www.M1914.org

www.bibleforchildren.org

